

讀通鑑綱目條記

讀通鑑綱目卷十二

武進李述來紹衍

大通元年

綱 梁攻彭城魏人擊却之

按人字當誤

二年魏長孫稚討蕭寶寅敗之

目 稚乃使其子彥

按稚子名子彥分注子下脫一子字

又 徵六年之粟折來歲之資

按原文租徵六年之粟調折來歲之資刪去租
調字則所謂來歲之資者何物邪

魏太后胡氏進毒弑其主詔而立臨洮王世子釗

目 臨洮世子釗高祖之孫

按魏書太后下詔故臨洮王寶暉世子釗體自
高祖蓋寶暉高祖之孫釗則曾孫也不當改體
自高祖爲高祖之孫

中大通元年魏主追尊其父懿爲皇帝

目 復尊無上王劭帝號

按原文又追尊彭城王劭爲孝宣皇帝分注所
刪乃不復成語

集覽 南頓君漢光武父封于南頓

按光武父欽爲南頓令非封于南頓

魏王顥拔榮城稱皇帝

集覽 榮城卽滎陽城也

按顥卽位于睢陽城南去滎陽三百餘里下五
月顥始取梁國滎陽耳水經注春秋沙隨之地
杜預注以爲卽梁國寧陵縣北之沙陽亭或謂

之堂陽亭俗謂之堂城胡注云榮堂字相近意
卽此地而字訛也

三年魏僕射爾朱世隆反

目 兆遂輕兵涉河騎叩宮門宿衛散走

按是時爾朱兆攻丹谷崔伯鳳戰死源于恭退
走兆乃輕兵倍道兼行從河橋西涉渡先是敬
宗以大河深廣謂兆未能猝濟是日水不沒馬
腹甲辰暴風黃塵漲天北騎叩宮門宿衛乃覺
彎弓欲射矢不得發一時散走帝始聞兆南下

欲自帥諸軍討之王鷲素附爾朱氏說帝曰黃
河萬仞兆安得渡帝遂自安及兆入宮鷲復約
止衛兵不使鬪蓋兆所以能輕兵涉河者緣源
子恭之退走所以能徑叩宮門者緣暴風揚塵
所以宿衛散走者緣矢不得發而要皆壞于王
鷲之陰附爾朱分注一概削之其渡河也如從
天而墜其至洛也如行無人之途史所以紀事
此所紀何事也且此等處關係國家存亡正是
鑒戒所存安得艸艸

五年

綱 魏以賀拔岳爲雍州刺史

按魏書岳傳節閔帝普泰二年加岳都督三雍
三秦二岐二華諸軍事雍州刺史及爾朱天光
率衆赴洛岳與侯莫陳悅下隴赴雍以應義旗
孝武帝永熙初仍開府兼僕射大行臺雍州刺
史二年詔岳都督雍華北華東雍二岐幽四梁
二益巴二夏蔚寧南益涇二十州諸軍事大都
督蓋岳之爲雍州刺史久矣此時所加者都督

二十州軍事也故下有西屯平涼及用字文泰
爲夏州刺史之事若僅爲雍州刺史則平涼夏
州均非所統矣今畧都督而書刺史失考

六年魏秦州刺史侯莫陳悅殺賀拔岳

目 悅旣害元帥自應乘勢直據平原

質實 平原郡名注見後主禎明二年

按平原本作平涼蓋是時賀拔岳屯平涼也分
注訛涼爲原質實沿之爲訓非是

目 卿不見賀拔侯莫陳悅乎

按悅字美

魏主修奔長安

目 魏主使源子恭守陽湖

質實 陽湖未詳處所

按湖當作胡傳寫訛也陽胡卽陽壺城戰國周
安王元年秦伐魏至陽壺水經注曰白水逕垣
縣故城北又東逕陽壺城東是也春秋時謂之
瓠邱襄元年晉人以五大夫在彭城者歸置之
瓠邱杜預曰垣縣東南有壺邱亭胡注曰陽胡

卽峭谷之北岸魏王欲入關故先遣子恭守之以防歡邀截在今垣曲縣東南二十里

魏獨孤信克荊州

質實 武川未詳處所或疑卽武州

按武川乃六鎮之一魏改女水曰武川其地在恒朔之北

又 三荆卽三楚注見太清三年彼注云江陵是謂南楚彭城是謂西楚吳郡是謂南楚

按此所稱三楚絕與史記不同而梁魏之際又

自有三荆非三楚也魏孝文置荊州于穰城亦名西荊州胡注曰以穰城在東荊州之西故名又有南荊州在舂陵北

荊州在伊陽東荊州在比陽

杜佑云東荊州今淮安郡或曰在比

陽胡注後魏置東荊州于比陽隋開皇中改淮安郡爲潁州領比陽平氏等七縣

按隋

志比陽縣後魏曰陽平開皇七年改爲饒良大

業初又改比陽爲淮安郡治唐初爲潁州治尋

爲唐州治蓋此淮安卽今南陽府唐縣地非今

之淮安府也此三荆當是荊州及南北二荆耳

太清三年注誤同此

大同三年東魏大丞相歡侵魏

目 東魏郎中杜弼以在位貪污請治之至是將出兵拒魏弼請先除內賊

按通鑑書此事于是年秋九月柔然爲魏侵東魏之後分注移屬于歡侵魏之下則至是將出兵拒魏句不可解矣

梁修長干塔

質實 阿育王塔在寧波府城東五十二里阿育王山中

按此是修長干寺之阿育王塔耳何得遠至寧波

東魏大丞相歡侵魏

曰 歡欲收兵更戰衆已退去

按通鑑歡欲收兵更戰使張華原以簿歷點營兵莫有應者還白歡曰衆盡去營皆空矣衆已退去四字殊不成文

質實 渭曲疑是地名未詳處所

按渭曲指渭水之曲也在沙苑東十里

四年盜殺魏廣州刺史李延孫

質實 東洛州未詳沿革

按西魏洛州治上洛以洛陽之地爲東洛州

九年東魏築長城于肆州

集覽 馬陵注見周顯王二十八年彼注云馬陵
在大名府城東南十里

按此是龐涓敗處也東魏築長城以禦柔然在
今山西之邊

十年梁尙書令何敬容有罪免

修言十二
七
目 敬容復爲太子詹事嘗于元圃白講老莊敬
容謂人曰云云

按嘗于元圃上不當削太子二字 又敬容之
罪坐妾弟盜官米以書屬河東王譽也分注似
亦不宜略

十一年梁遣兵討李賁敗之

質實 嘉寧城未詳處所

按宋書志吳孫皓建衡三年分交趾立新興郡
并立嘉寧縣晉武帝太康三年更郡曰新昌五

代志交趾郡嘉寧縣舊置興州新昌郡隋改曰

峯州

梁散騎常侍賀琛上書論事

集覽 控總或倥偬王逸曰困苦也一曰事多增損不服給也

按此云郡不堪州之控總乃是控馭總束之意與倥偬無涉

又 聞茸賈誼續離騷闢茸尊顯

按此是弔屈原文賈誼無續離騷也

魏遣使執其瓜州刺史鄧彥

書法 執者執無罪也譏用詐也彥殺元康奪其
位討之可也旣以爲刺史而又遣使執之非刑矣
按魏是時方以東事爲急勢不能遠討瓜州命
申徽宣詔慰諭因執而伐之此亦省事寧人之
至計何爲不可書法好言理而不揆事勢類如
此

梁大清元年

綱 東魏大行臺侯景以河南降魏

曰 魏以景爲太傅大行臺

按行臺之名猶云刺史太守耳上當冠以地是時景爲河南道行臺不宜削河南道三字

質實 廣州注見秦始皇三十三年南海

按是時廣州治襄城非南海之廣州

東魏遣兵討侯景

目 景割東荆北兗州魯陽長社四城賂魏以求救

質實 北兗州注見秦二世二年盱眙

按是時候景之地不得至盱眙胡氏曰時無北
兖州惟北荊州治伊陽與西魏接境豈史家誤
以荊爲兖邪

東魏大將軍澄還晉陽

目 鑿鼓山石窟佛頂之旁

按通鑑作石窟佛寺此頂字當誤

二年東魏慕容紹宗擊侯景景衆潰走

質實 馬頭戍未詳處所滁州來安縣北七十里
有馬頭山未知是否

按侯景方襲壽陽無緣轉南至來安此馬頭戍
蓋在今壽州西北梁天監五年取魏合肥魏人
守壽陽于馬頭置戍普通五年梁取壽陽亦置
戍于此

綱 梁交州司馬陳霸先討李賁平之

按通鑑屈獠洞斬李賁賁兄天寶收餘兵圍愛
州陳霸先討平之則霸先所平者賁餘黨也直
以爲李賁恐非事實

綱 梁遣散騎常侍徐陵如魏

按魏已分東西此所修好者東魏也魏上誤漏
東字

綱 東魏遣兵畧地江淮取二十三州

按此是承通鑑之誤北史云先是文襄遣行臺

尙書辛術率諸將畧江淮之北至是凡所獲二

十三州

在孝靜武定
六年八月

通鑑遂據而書之耳不知

此時侯景雖據壽陽尙未顯叛梁緣邊鎮戍亦

絕無與東魏交兵之事則此二十三州者于何

取之胡注明年東魏始盡有淮南之地史究其

終言之則當書此于明年不當遽書于此也又東魏明年所取淮南地鍾離壽陽下邳東海淮陰山陽合肥義陽耳亦不得有二十三州蓋北史張大其詞通鑑仍其文而未察其實耳

梁侯景反壽陽

質實 朱張未詳其名也

按朱張謂朱异張綰之族

梁邵陵王綸還軍赴援

質實 黃城在常州府無錫縣西十二里俗呼爲

黃斗城

按邵陵王自京口入援何緣遠至無錫顧祖禹
曰黃城當作江乘又金陵志上元縣東北清風
鄉有黃城邨

又鍾山漢秣陵尉蔣子文逐盜死于此子文祖
諱鍾因改蔣山

按吳大帝祖諱鍾非子文

又安南疑是縣未詳沿革

按晉武帝分江安立安南縣五代志無之胡注

白蓋以古縣名爲侯國

梁鄱陽王範南康王會理將兵入援

質實 歐陽疑是地名未詳處所

按水經注刊溝水上承歐陽引江入埭六十里
至廣陵城宋大明三年竟陵王誕舉兵廣陵詔
沈慶之討之慶之進至歐陽齊延興元年蕭鸞
使王廣之襲南兗州刺史安陸王子敬廣之至
歐陽遣別將陳伯之先驅入廣陵是也在今儀
真縣東北十里 胡注地名歐陽見于史者非

一處裴遠移長孫稚欲營歐陽在壽春境吳喜
使蕭道成留軍歐陽在淮陰界

梁散騎常侍韋粲及東西道都督裴之高柳仲禮等
各以兵入援

質實 南洲未詳處所

按南洲卽姑孰南洲亦名南浦宋孝建初臧質
以南郡王義宣叛遣其黨龐法起將兵趣南浦
梁承聖初王僧辨討侯景景將侯子建據姑孰
南洲景戒于鑒引船入浦卽南浦也在今當塗

縣西南三十五里

又 張公洲未詳處所

按韋粲傳張公洲蓋卽蔡洲金陵志云蔡州周回五十三里張公洲周回三里在江寧縣西南五里蓋蔡洲之別渚云

又 青塘未詳處所

按青塘卽青溪南岸

三年梁以侯景爲大丞相與之盟

質實 馬邛洲未詳處所

按洲在今江寧縣北志云晉元帝渡江初牧馬之處胡氏曰卽今王家沙老鶴嘴一帶

又 武城未詳處所

按水經注武口水上通安陸之延頭南至武城入大江吳舊屯所在荊州界盡此今之沙武口卽其地

綱 東魏攻魏潁川魏人擊之殺其將慕容紹宗
劉豐生

按是時魏遣兵救潁川阻水不得前紹宗豐生

臨堰急攻暴風飄船爲城上人所牽蓋與出兵
擊殺者大異人擊之三字似屬可削

東魏大將軍澄克潁川

目 祭酒盧潛

按祭酒西閣祭酒也後齊之制三師二大三公
各置東西閣祭酒西閣二字不可省誤同漢獻
建安元年

綱 侯景殺蕭正德

考異 提要殺作誅

書法 以誅書何正德爲子則不孝爲臣則不忠
天地間罪人也人人得而誅之

按書法則知朱子本作誅據考異則知刊本作
殺自元已然矣

梁湘東王繹使其世子方等攻湘州刺史河東王譽
質實 麻溪未詳處所

按水經注麻溪水口在臨湘縣北瀏口戍南
盜殺東魏大將軍勃海王高澄于鄴

目 澄獲衡州刺史蘭欽子京

質實 衡州注見宋文帝元嘉十六年

按衡當作徐傳寫之誤質實沿之非也

梁簡文帝大寶元年

綱 齊王洋稱皇帝

按齊王洋上當有東魏字據陳霸先受禪書梁
陳公霸先其蕭道成楊堅俱以中無間事承上
所書故不重敘若蕭衍高洋宇文覺則俱宜指
言其國此偶脫耳考異于宇文覺注云周上漏
魏字而于蕭衍高洋不之及亦疎也

目 司馬子如逆洋于遼陽固言未可景業等復
勸之洋乃發晉陽

按通鑑洋因子如之言遂還晉陽因景業等敦
勸乃復發晉陽今削去遂還晉陽一節則既至
遼陽云何重發晉陽也

洋擁兵而東至平都城
故子如逆之于遼陽遼

陽卽平
都城也

質實 平都城未詳處所

按九域志遼州遼山縣有平城鎮

侯景陷江州

質實 蠡南地名未詳處所

按蠡南謂彭蠡湖以南也

綱 魏太師泰伐齊不戰而還洛陽平陽皆降于齊

按通鑑河南自洛陽河北自平陽以東皆入于齊蓋謂洛陽平陽以東之地非卽謂洛陽平陽也平陽乃高歡高洋作鎮之地本未嘗屬西魏洛陽雖大統中曾爲西魏所取却山之敗卽已失之不至此時始入齊也綱所書殊失檢

質實 東城未詳處所惟南陽府城北有濛縣城
俗呼東城

按胡注卽晉陽之東城也

二年梁湘東王遣大都督王僧辨伐侯景

集覽 白堦地名未詳處所

按白堦在岳州府華容縣東

梁元帝承聖元年梁湘東王繹遣王僧辨陳霸先討
侯景

目 自江南出湓口

按江南當作南江湖注贛水謂之南江

質實 白茅灣未詳處所

按白茅灣在乘落洲西南

齊以辛術爲吏部尙書

集覽 大選之職東魏靜帝改停年格銓擢賢能
又沙汰尙書郎妙選人地以充之

按大選之職卽謂吏部尙書耳集覽蔓引無謂
綱 梁以蕭循爲湘州刺史陸納襲巴陵循擊敗
之

按分注循部分將士擊之獲其一艦納退保長沙則納亦未敗也當云擊却之耳

三年齊主擊山胡敗之

質實 石樓疑是山名未詳處所

按水經注河水東逕蒲川石樓山南蓋其地在蒲子縣西五代志汾州樓山縣有北石樓山又有石樓縣舊置吐京郡

魏以李遷哲爲信州刺史

質實 直州未詳處所

按五代志西城郡安康縣齊置安康郡魏置東梁州西魏改曰直州

魏遣柱國于謹帥師伐梁

質實 石梵疑是地名未詳處所

按杜佑曰石梵在沔州沔口上

又 金城未詳處所

按荊州記江陵城中有金城故牙城也晉宋時凡城內牙城皆謂之金城義熙八年劉裕遣王鎮惡襲劉毅入江陵攻其金城是也

梁敬帝紹泰元年梁陳霸先殺王僧辨

質實 羅落南山之蠻名與羅共賤麼些共三種
世居濃蕩州

按此羅落謂江乘之羅落橋也自江乘至羅落
橋京口趨建康之大路宋武帝伐桓元由此

太平元年梁陳蒨克吳興獲杜龕殺之

考異 此殺字當作誅

陳霸先及齊師戰敗之殺蕭軌及徐嗣徽

考異 及字當作誅

按霸先之殺僧辨非果忠于梁室也直因事以
除其所忌如宋武帝之于劉毅齊高帝之于沈
攸之耳僧辨不死則霸先不篡矣殺杜龕及徐
嗣徽猶之殺僧辨也安得書誅

目 齊兵至秣陵陳霸先召周文育與徐度杜陵
禦之嗣徽因留船蕪湖自丹陽步上進及兒塘霸
先拒之于白城適與文育會將戰風急霸先曰兵
不逆風文育曰事急矣何用古法抽槊上馬先進
衆軍從之風亦尋轉殺傷數百人安都帥十二騎

笑其陳破之稍節本文

按此節敘事多舛詳列通鑑本文正之通鑑云
齊兵至秣陵故治陳霸先遣周文育屯方山徐
度顛馬牧杜稜顛大航南以禦之今分注改遣
爲召不知文育等方自建康出屯前此未嘗他
往何所爲召邪又刪去屯方山字則下文齊師
夜至方山斷文育歸路不見端緒矣通鑑又云
嗣徽留船蕪湖自丹陽步上陳霸先追侯安都
徐度皆還蓋是年三月齊師保蕪湖故遣安都

守梁山以截江路今嗣徽自蕪湖舍舟步上故
召安都還守徐度前頓馬牧者以禦丹陽之兵
今齊兵已直逼京邑故亦召之并力也分注于
前條書遣侯安都周鐵虎立柵于梁山以備之
而此處畧追還一節則下文安都帥十二騎突
陣不知其何自而來矣通鑑又云霸先拒嗣徽
等于白城文育抽槊上馬先進風亦尋轉殺傷
數百人侯安都與嗣徽等戰于耕壇南安都帥
十二騎突其陣破之蓋文育之殺傷數百人乃

與霸先合兵戰于白城也安都之十二騎破陣
乃是梁山還兵遇戰于耕壇南也分注削侯安
都與嗣徽等戰于耕壇南句乃似安都與霸先
并兵俱戰又誤合兩事爲一事矣

二年周冢宰護弒中山王

考異 提要中山王作宋公據上文書廢魏主爲
宋公合從提要諡曰魏恭帝

按諡曰魏恭帝五字是分注誤入考異

周冢宰護弒其君覺

目 軍馬司孫恒

集覽 軍馬司將軍屬官秩百石

按軍馬司當作軍司馬胡注唐六典周禮大司馬屬官有軍司馬蓋兵部郎中之任也後周依周置官軍司馬中大夫五命

綱 周祔太祖于太廟

按陳書武帝紀戊子遷景皇帝神主祔于太廟蓋是月戊辰武帝受梁禪辛巳追尊皇考文讚爲景

皇帝廟號太祖也綱誤以爲周太祖繆矣其所以致誤者通鑑本文云乙酉周王祀圜邱丙戌祀方邱甲午祭太社戊子太祖神主祔太廟蓋戊子之上本有圜隔檢會偶踈遂合兩國事爲一國耳或曰安知非傳刻之誤訛陳爲周乎曰陳無太祖朱子若審以是書陳事者上當書追尊其父某爲太祖矣至宇文泰之廟號太祖則已見上周主祀圜邱之下故知周字是原本之誤也

讀通鑑綱目條記卷十三

武進李述來紹仔

陳武帝永定三年陳主霸先殂

目 子昌頊皆以江陵之陷沒于長安

按通鑑時皇子昌在長安不及頊蓋頊乃武帝
兄始興王道談之子也分注合之乃與後封子
伯茂爲始興王注自相矛盾 天嘉元年分注
高祖以其子昌頊在長安誤與此同

陳文帝天嘉元年

綱 陳主殺其弟衡陽王昌

按呂乃陳主從父弟也恐不當直書弟

二年

綱

陳天嘉二年周高祖武帝邕保定元年齊世祖武成帝湛太寧元年

按是年十一月齊武成帝始立歲首當先書齊

皇建二年乃繼以世祖太寧之號考異未之及

偶疎也

陳天康元年徐陵爲吏部尙書

目 永安之時

按永安當作永定此仍通鑑之誤

陳宣帝太建三年齊瑯琊王儼殺和士開

目 齊主拔刀環築其辮頭良久乃釋之

按北史帝拔儼所帶刀環亂築句辮頭良久句

乃釋之蓋當時刑人皆先辮頭隋主將斬宇文
化及解衣辮髮已而釋之是也若云築其辮頭
辮頭如何可築且以髮爲辮頭于古無此語也
此正坐讀前史失句讀耳

集覽

龍子瑯琊王名儼字龍子

按儼字仁威龍子非字胡註云以儼帝子故謂之龍子是也

齊主殺其弟琅玕王儼

集覽 周公旦管叔鮮之兄也

按孟子明言周公弟管叔兄

四年齊主殺其左丞相咸陽王斛律光

目 胡氏曰斛律明月能爲將矣相則未也方是時祖珽之徒濁亂齊室光爲上將不能明告于君數諸人之罪放流竄殛而以空言肆罵夫復何補

按明告于君放流竄殛談何容易胡氏此論可謂責人無已也

十二月齊主廢其后胡氏

書法 于是令萱激太后太后怒令送還家廢爲庶人其斥齊主何誅意也立穆氏爲右后則固有廢胡后之心矣

按通鑑云齊主猶思之每致物通意安得云固有廢胡后之心斥書齊主正是責其不能自立耳

五年陳將軍吳明徹將兵擊齊

目號蒼頭犀角大刀 大刀十餘人出戰
刀皆當爲力

又 高唐齊昌瓜步胡墅等城亦降于陳

按通鑑四月乙酉南齊昌太守黃詠克齊昌外
城十月戊午湛陀克齊昌城蓋此時僅克其外
城至十月始盡破之也分注于此預云齊昌城
降則下文十月中綱所書遂取齊昌徐州等城
句爲複贅矣

質實 秦州未詳沿革或疑卽秦郡

按通鑑明言齊人于秦郡置秦州

又 无梁縣名未詳沿革

按卽无梁堰也非縣名輿地紀勝曰无梁堰卽
涂塘堰上有无梁城亦曰吳王城在今六合縣
及滁州之境

陳敗齊師克巴青州山陽廣陵等城

質實 馬頭城名未詳處所

按城在今懷遠界沈約志曰馬頭郡晉安帝立

因山形如馬頭而名宋元嘉二十七年魏入寇
長孫真趣馬頭齊建元二年魏拓跋琛攻拔馬
頭戍梁天監五年魏將元英取梁城逐北至馬
頭城皆是也輿程志懷遠縣西二十二里地名
馬頭城爲渡淮者必經之地

又廣陵注見晉成帝咸和三年彼注云在揚州
府四十里

按此廣陵非江都之廣陵胡注魏太和中蠻帥
田益宗納土于魏魏爲立東豫州治廣陵城五

代志汝南郡新息縣魏置東豫州則此廣陵乃
新息之廣陵也十一月周韋孝寬侵陳克壽陽
及廣陵卽此質實誤同

七年周使開府儀同三司伊婁謙如齊

質實 萬春疑是地名未詳處所

按萬春今蒲州河津縣地新唐書志武德五年
析龍門置萬春縣胡氏曰蓋以舊地名名縣也
八年周太子贊還長安

目 胡氏曰贊之不才世祖知之矣

按世祖當作高祖 下周主取平陽分注引胡氏語誤同此

十年

綱

陳太建十年周宣帝贊宣政元年

按是年三月武帝改元宣政至六月殂明年宣帝改元大成以爲周宣帝贊宣政元年誤

十一年周主殺其徐州總管王軌及宮正宇文孝伯
目 胡氏曰使孝伯于齊王憲烏丸軌之死也引
義力爭爭而不從死之可也而孝伯于此二者諫

旣不力又贊成之

按北史孝伯傳周主謂孝伯公能圖憲當以其
官位相授孝伯叩頭曰齊王戚近功高棟梁所
寄臣若順旨臣爲不忠陛下不孝之子也不可
爲不力諫矣王軌被殺更與孝伯無涉胡氏所
以致誤者蓋緣誤讀通鑑耳通鑑原文云周主
從容問鄭譯曰我腳杖痕誰所爲也對曰事由
烏丸軌宇文孝伯因言軌將鬚事宇文孝伯四
字本上屬爲句胡氏誤屬下句讀而以將鬚事

爲孝伯所言故云贊成之也

集覽 烏丸軌三軌本烏丸人故呼曰烏丸軌

按北史傳軌是太原人累葉仕魏賜姓烏丸氏
周主贊傳位于太子闡

質實 楚撻楚謂懷愴苦楚之意

按楚謂荆耳

大建十二年周主贊殂

目 御史大夫柳裘韋謩

按隋書作御飾大夫柳裘內史大夫韋謩御飾

內史皆字文周改定官名今刪而併之爲御史大夫失其實矣

質實 趙陳越代滕五國名趙注見漢景帝三年
陳注見周赧王三十六年越注見漢和帝永元元
年代注見秦王政三年滕注見唐懿宗咸通九年
按趙陳越代滕謂趙王招陳王純越王盛代王
達滕王逌耳質實泛列無謂

周相州總管蜀公尉遲迥舉兵相州討丞相堅堅遣
韋孝寬將兵討之

考異 凡舉兵以義則拒之者書擊不書討則此條下討字乃傳誤也

書法 書舉兵討罪堅也故迴書官書爵重予之而堅兵止書擊

按書法則朱子原本本作擊後乃傳訛作討遂致考異云云也

綱 周隨王堅殺代王達滕王迺

按上書周丞相堅進爵隨王中無間事此周字當羨宋昇明三年齊公蕭道成不書宋齊中興

元年梁王衍不書齊皆蒙上爲文也 下隋王
堅稱皇帝不書周亦是蒙上

十三年

綱 隋主堅弒介公闡

按綱目于弒故主者皆不名

晉零陵王宋汝陰王魏中山王齊巴

陵王梁江陰王皆不名 此闡字蓋誤衍

陳後主至德元年隋減調役

集覽 減役者歲爲二十日先是每歲十二番今

減爲二十日役

按每歲十二番則三十日役今減去十日也集覽殊不分曉

綱 吐谷渾寇隋臨洮

按隋書吐谷渾又寇廓州今書臨洮而不書廓州疑脫也

陳後主至德二年隋詔公私文翰並宜寶錄

質實 魏之三祖平文帝廟號太祖昭成帝廟號高祖太武帝廟號世祖

按魏之三祖崇尙文詞蓋指曹魏太祖武帝操

高祖文帝丕烈祖明帝獻故次言江左齊梁也
若拓跋魏諸帝皆非崇尚文詞者 又拓跋魏
始號平文爲太祖昭成爲高祖後更號道武爲
太祖孝文爲高祖又神元廟號始祖獻文廟號
顯祖又不止三祖也

禎明元年陳主殺其大市令章華

質實 左傳二十年之外吾恐麋鹿復遊于姑蘇
矣

按左傳無此語

二年隋以晉王廣爲淮南行省尙書令行軍元帥帥師伐陳

目 陳江中無一鬪船

按通鑑初上以蕭巖蕭瑒擁衆來奔欲遠散其衆以巖爲東揚州刺史瑒爲吳州刺史使領軍任忠出守吳興郡以襟帶二州使南平王嶷鎮江州永嘉王彥鎮南徐州尋召二王赴明年元會命緣江諸防船艦悉從二王還都爲威勢以示梁人之來者由是江中無一鬪船今刪諸防

船艦悉從二王還都一節則江中無一鬪船句
不得事實矣

隋高祖文皇帝開皇九年總管賀若弼韓擒虎進軍
滅陳

目 陛下當就上流進軍

按通鑑原文陛下惟當具舟楫就上流衆軍分
注所刪易殊不達意

又 陳人欲戰忠揮之曰老夫尙降諸軍何事衆
皆散走惟袁憲在殿中

按通鑑衆皆散走下有于是城內文武百官皆遁十字蓋衆皆散走者軍人也袁憲之在殿中別于遁走之百官言之非別于走散之軍人言之也不宜刪去

綱 以王雄爲司空

目 左衛大將軍王雄貴寵特盛

按隋書觀德王雄初名惠高祖族子也高祖受禪除左衛大將軍遷右衛大將軍封廣平王與高潁虞慶則蘇威稱四貴高祖陰忌之不欲其

典兵馬乃拜司空改封安德王此乃誤以王爲姓又左衛當作右衛仍通鑑之誤

十年番禺夷反遣給事郎裴矩討平之

目矩至南康得兵數千人擊斬仲宣遣別將至南海高涼洗夫人遣孫盎會三藏等合擊仲宣仲宣衆潰

按上文已云擊斬仲宣下乃又云合擊仲宣可謂舛矣據通鑑矩至南康得兵數千人仲宣遣別將周師舉圍東衡州矩與大將軍鹿愿擊斬

之進至南海分注所改易殊謬誤也

十一年殺滕王瓚

質實 栗園未詳處所

按栗園在長安南

十七年遣太平公史萬歲討南寧羗平之

質實 蜻蛉川未詳處所

按蜻蛉川卽漢越巂郡青蛉縣地

十七年詔諸司論屬官罪聽律外決杖

目 蕭摩訶子世略在江南作亂摩訶當從坐綽

固諫上命綽退

按通鑑摩訶于世略在江南作亂摩訶當從坐上曰世略年未二十亦何能爲以其名將之子爲人所逼耳因赦摩訶綽固諫不可綽本諫赦摩訶而分注乃以爲諫從坐正相反矣

十九年遣楊素等分道伐突厥

集覽 鹿角陣名猶春秋魚麗陣耳

按設鹿角爲方陣蓋卽拒馬槍之類所以爲環衛耳何云陣名

二十年賀若弼坐事下獄

質實 高鳥盡良弓藏左傳越既滅吳范蠡去之
遺大夫種書曰云云

按此亦非左傳

仁壽元年

綱 廢太學及州縣學改國子爲太學

目 尋改國子爲太學

按國子下皆常有學字

書法 尋改國子爲太學矣則其書廢何傷之也

按太學與國子學是二學廢太學而改國子學
爲太學名存而實亡矣安得不書廢乎書法所
云曲而無謂

二年葬獻皇后

考證 溫公書儀隋煬帝爲太子居太猷皇后喪
據此獻上當有文字

按文獻皇后從文帝而稱之猶漢之明德馬皇
后和熹鄧皇后也此時文帝尙在祇合書獻皇
后

四年太子廣弑帝于大寶殿而自立

集覽 兵帖軍籍也一作兵士帖

按追東宮兵

句

帖上臺宿衛

句

帖如津帖之帖

杜牧云帖以宜潤弩手是也上臺指文帝所居
時楊素與太子密謀逆故以東宮兵參益宿衛
耳集覽誤讀帖字爲句

并州總管漢王諒起兵晉陽

目 毓與濤謀出兵拒之濤不可毓追斬之

按通鑑毓謂濤曰漢王構逆敗不旋踵當與卿

出兵拒之濤驚曰王以大事相付何得有是語
因拂衣而去毓追斬之今刪拂衣而去四字則
追字爲贅

集覽城紇單賁紇姓也單賁其名

按紇單北人複姓耳

隋煬帝大業元年開通濟渠引汴水開邗溝置離宮
造龍舟

質實 江溝未詳處所

按開刊溝入江句溝廣四十步句質實誤讀

又溝通鑑本作渠

又離宮常州府城東南二十里有離宮乃隋大業間置

按自長安至江都置離宮四十餘所與常州渺不相涉

劉方大破林邑

質實 闍黎江未詳處所

按江在占城北境

契丹寇營州

目 虐獲甚衆以女子及畜產之半賜突厥
按虜獲甚衆下有殺其男子四字不當刪

二年

綱 始建進士科

按此係通鑑所無檢北史及隋書紀皆不載建
進士科事通典及文獻通考皆有煬帝始建進
士科語而又不詳其年月此載之二年七月不
知所本

四年赤土入貢

質實 赤土國名未詳沿革

按隋書赤土國扶南之別種在南海中水行百餘日而達所都土色多赤因以爲號杜佑日崖州直南水行便風十餘日到赤城國

五年

綱 遣兵擊吐谷渾不克

目 詔大將軍張定和光祿大夫梁默等追討皆爲所殺獨衛尉卿劉權出伊吾至青海虜獲千餘口追奔至伏俟城

按通鑑伏允以數十騎遁出遣其名王詐稱伏允保車我真山詔右屯衛將軍張定和往捕之定和挺身登山吐谷渾伏兵射殺之其亞將柳武建擊吐谷渾破之吐谷渾仙頭王窮蹙帥男女十餘萬口來降遣左光祿大夫梁默等追討伏允爲伏允所殺衛尉卿劉權出伊吾道擊吐谷渾至青海虜獲千餘口乘勝追奔至伏俟城蓋是時伏允以數十人遁仙頭王以十餘萬口降張定和挺身獨戰而死其副仍擊破吐谷渾

則兵未敗也獨梁默偏師陷沒耳劉權又取吐谷渾所都之伏侯城置西海郡綱所書不克字似未得其實分注刪柳武建擊破吐谷渾及仙頭王來降二節又加獨字于衛尉卿劉權虜獲之上乃是沒實事以就綱也

質實 臨津關未詳處所

按水經注河水自澆河東流逕邯州城南又東逕臨津城北白土城南爲緣河津渡之處前涼置臨津縣屬晉興郡後爲吐谷渾所廢在今河

州西北百三十里

又河源郡名未詳處所

按隋志河源郡置于赤水城唐鳳儀二年復置
河源軍在今西寧府西南

殺司隸大夫薛道衡

目 潘州刺史

質實 潘州未詳沿革

按隋志廣州仁壽元年改番州蓋因番禺以名
州也潘字誤

七年王薄張金稱高士達竇建德等兵起

目 號阿勇賊

集覽 阿勇賊之號

正誤 阿勇今按闕

按唐書作阿舅

質實 高雞泊未詳處所

按唐書高雞泊廣袤數百里葭蘆阻奧可以違
難在今恩縣西

九年元感敗死

質實 破陵未詳處所

按胡注在河陽南岸洛城東北

殺楊元感党與三萬餘人

集覽 承藉緒餘緒殘也承藉他人殘餘之業也

按以緒爲殘古無此訓文帝之業何云殘餘

十二年帝如江都

質實 箕山公路二府未詳其義今鳳陽府城及

盱眙縣境有公路城相傳漢末袁術所築未知是

否

按二府俱在洛口何得遠至江北

翟讓李密起兵攻滎陽

質實 瓦岡未詳處所

按在今兗州府境

十三年翟讓李密據興洛倉略取河南諸郡

質實 河南郡名注見秦莊襄王元年三川

按此通指大河以南非謂河南一郡

突厥立劉武周爲定楊可汗

質實 定楊郡名注見陳宣帝太建十一年

彼處仍無

注

按定楊猶平陽也取平定隋氏之意非郡名

梁師都取雕陰宏化延安等郡

質實 鹽川郡未詳沿革惟鞏昌府漳縣西南五里有鹽川寨

按隋志鹽川郡西魏置西安州後改爲鹽州煬帝改爲郡卽今寧夏地

流人郭子和起兵榆林

質實 永樂本漢北平縣地名屬中山國後魏析

置永樂縣

按永樂長樂猶平楊定楊取其號耳非地名也
時子和方據榆林何能東有中山北平

十三年李密攻東都入其郭

質實 回洛東倉未詳處所

按唐志河南關南有回洛城東魏大象初侯景
卽山之戰諸軍皆北渡河橋万俟洛獨勒兵不
動魏人畏之而去高歡因名其所營之地曰回
洛隋大業十年于其地置倉倉城周十里武德

三年世民攻王世充遣黃君漢自河陰攻回洛城卽此在今孟津縣境

李淵自稱大將軍開府置官屬

自以柴紹爲右領軍府長史諮議

按通鑑柴紹爲右領軍長史句諮議譙人劉贍

領西河通守句此諮議二字失刪

李密復取回洛倉

質實 平樂園未詳處所

按胡注此蓋卽漢魏平樂觀之地爲園也然漢

魏平樂觀在洛城西隋旣遷營新都則平樂園
當在都城東

李淵引兵至霍邑

目 胡氏曰堅守晉陽收召豪傑厚集其衆分擊
二京義聲旣震羣盜自下乃遣良將總銳師南指
揚土則不逾旬時罪人斯得

按唐之興莫要于先得關中以爲基本局守晉
陽何由厚集其衆耶分擊二京直指揚土此直
以口擊賊耳豈審時度勢之言

武威司馬李軌起兵河西

質實 昌松地名未詳處所

按昌松卽漢武威郡蒼松縣前涼張氏置昌松
郡後周爲昌松縣隋開皇初改縣曰永世後復
曰昌松屬涼州在今莊浪縣西

涿郡畱守薛世雄擊李密

質實 七里井未詳處所

按胡注其地去河間七里故名

王世充救東都

集覽 防魯邑名屬兗州

按密囚慈明慈明說防人席務本使亡走此防人乃謂防守之人耳

王世充及李密戰于落北敗績

質實 黑石疑是山名未詳處所

按黑石渡在鞏縣西二十五里洛水津濟處又月城未詳處所

按胡注蓋臨洛水築偃月城與倉城相應

李淵克長安

集覽

後聽句絕注見晉愍帝建興二年聽事

正誤

後聽今按聽卽廳字六朝以來乃始加广

按通鑑淵迎王于東宮遷居大興殿後句聽姚

思廉扶王至順陽閣下泣拜而去句集覽正誤

均未得其句讀

恭帝侑義寧二年

綱

唐王淵自爲相國加九錫

按分注九錫殊禮歸之有司則未嘗受也綱于
莽操輩辭不受者皆書之此雖未嘗辭然據分

注所載唐主語似去加九錫三字乃爲得其實也

魏公密敗宇文化及于黎陽

曰 蘇威在東都

按都當作郡

秦主舉卒

考異 按崩葬例無統之君稱帝者曰某主某殂此當書殂誤作卒

書法 凡主書卒有正統也于是夷隋于列國矣

則其卒秦主何將子唐以正統也

按此武德元年也至七年始以正統子唐何得于此時預云將子之乎且正統之子不在書卒與否書法附會當從考異

唐秦王世民破秦兵圍折塢

質實 淺水原莫詳處所惟西安府邠州城西九十里宜祿廢縣北五里有後魏淺水縣未知是否按淺水原卽鵠觚原新唐書志宜祿縣北有淺水原是也後魏無所謂淺水縣者不知質實何

據

綱 唐殺隋河東守將堯君素

書法 殺君素者君素之左右也書唐殺之何書
唐殺之所以微著君素之節也

發明 書河東守將則見其不失官守書隋則見
其不失臣節書唐殺則見唐人非理彊殺之皆予
之之意也然旣予之而又不得爲死節何哉煬負
天下之誅以至累及臣子是以書法如此不然將
書曰唐攻河東隋守將堯君素死之矣

按君素爲左右所殺而忽歸獄于唐此不足以爲唐罪而徒失事之實決非朱子意也綱目書盜殺例如北魏李延孫東魏高澄爲其下所殺者皆書盜殺則此唐字爲盜字之誤無疑書法云微著君素之節穿鑿牽強發明謂唐人非理疆殺則憑空誣造也又云煬負天下之誅以至累及臣子不得書死節尤謬大業十二年將軍潘文長書戰死矣況此又非煬帝之世乎

夏王建德破宇文化及于聊城誅之

質實 海曲漢之縣名屬琅玕郡舊設鹽官名日照鎮金置日照縣

按聊城是齊之西界左氏謂聊攝以東是也此海曲通指北海之濱非琅玕之海曲縣

隋王世充侵唐穀州

集覽 九曲地名屬鄯州在隴右

按唐方與世充相持于河洛之間何得遠至隴右水經注洛水自宜陽而東逕九曲南其地十里有限九曲穆天子傳所謂天子西征升于九

阿此是也洛水又東與豪水會豪水出新安縣
崑山南流歷九曲東而南流入于洛舊唐書志
熊州壽安縣義寧元年移治九曲城武德三年
史萬寶邀敗王世充子元應于九曲卽此也在
今宜陽縣東三十里